

## Su Trigu

### Semenonzu

Si comintzaiat dae santuaine-santandria- nadale a sigundu de sas annadas. Si araiat cun araos de linna tiraos dae bacas o boes (duas). S'arau prus antigu fuat una mata lìera murcada a duos corros po bortare sa lea. Su cambu lìeru chi faiat de punta serbiat po intrare in sa terra; ddue fuat s'**arbada** posta a pustis de sas coas de sa mata.

A coa semper de linna est bessia **sa 'entale**( serbiat po forrogare sa terra) chi fuat dereta e a ifatu de s'arbada. A sa 'entale si atacaient **sas origas**: custas non fuant deretas ma unu pagu apertas e ligadas a sa '**rughe**. Ddue fuat fintzas **sa manuntza** po ghiare(guidare) s'arau.

Acabau de arare e po non tragare sa terra cando proiat , si faiant 1-2-5-10 surcos a cunforma de sa pendèntzia de su cunzau.

Po semenare, si pigaiat unu tantu de trigu chistiu dae s'annu colau.

Cando si semenaiat si betaiat sa **tula**: cheriat nàrrere chi si faiat unu surcu a in antis, po sinnalare fintzas a in ue si depiat prènnere su cunzau. Su trigu si poniat in sa bërtula e cun sa manu si ispartzinaiat in terra.

A sigundu de su terrinu e de su massàju in una die si podiat arribare a semenare dae duas a su tantu de una **carreta**(5 misuras). Si narat ca po semenare unu ètaru de terrinu ddue cheriat **una carra de trigu**(20 misuras).

### Triballos

Cando sa pranta de su trigu zughiat tres fozas bonas si che tiraiat s'erba e si marraiat cun unu marroneddu istrantu. Custu beniat fatu in ghennarzu o freazu a sigundu de su tempus e de su zassu. Tempus fritu e zassu umbrosu su trigu istentaiat de prus, invetzes in zassu solianu e tempus bonu cuitaiat a fàere.

In beranu, cara a arbile –màju cando est bessinde s'ispiga, si **illimpiaiat** o si **innetiaiat**. Custu triballu serbiat po che tirare s'erba e si depiat fàere mesches a manos.

Si po fàere custos triballos, serbiant massajos sa paga fuat: de una misura po s'òmine e de mesu misura po sa fèmina a zorronada. Medas bortas si podiat fàere a càmbia, cheriat nàrrere ca unu massaju andaiat a s'anzenu e a pustis ddi torraiant sa die de triballu. Custa fuat una manera chi serbiat po acabare prus in presse su triballu siat in unu che in s'àteru cunzau e fintzas po non s'ispantare.

Cando su trigu fuat cumpliu tociam a istare atentos a sa puzonia chi andaiat a papare sos 'ranos. Tando calincunu depiat andare a che ddos isuliare: cun sas matràculas o cun carchi cosa chi faiat sonu o a tzacurrimanos .

### Messare e Messonzu

Po messare serbiat una **frache a dentigheddas**; una borta ingurdada non si podiat orrodare ma in casu de bisonzu si orrodaiat cun una limighedda fine fine.

In su messonzu, in antis si faiat **sa manada**: cheret nàrrere ca si messaiat su tanto de prantas de trigu chi sa manu impressaiat. Carchi borta si podiat **addopiare sa manada**.

8-10 manadas faiant unu **mannugu**; ònnia mannugu podiat fàere 1 misura de trigu. 12 mannugos faiant una **màniga**.

Po ligare su mannugu si usaiant semper sas prantas de trigu e totu.

Po sicare su **sèide** sos mannugos si poniant **aristas in artu e 'runcos a terra**, a su mancu po duas dies filu a pare.

### Su triulonzu e s'arzola

Po seberare su 'ranu dae sa paza si depiat triulare in **s'arzola**. S'arzola podiat èssere collocada o in una codina o in unu zassu bentosu de terra intostigada e aparizada su prus a lisu possibile.

Una perda atacada a bacas o boes beniat fata passare in pitzu de su sèide ispartzinau in s'arzola.

In sa perda depiat èssere fatu o unu istampu o una **cola** (iscalanadura) chi serbiat po fàere passare e ligare sa cadena o su cannau.

Sos pegos ziraiant in antis a unu chirru e a pustis a s'àteru e onni tantu su massaju, cun su triutzu, moviat dae fundu a susu sas ispigas ancora intreas.

Si po casu sa note in antis de su triulonzu betaiat lentore, tocariat a ispetare chi su trigu si arridaiat.

A pustis triulau si **bentulaiat**: in antis cun su triutzu cando ancora su sèide fuat intreu, a pustis cun sa pala de linna. In **Arzolas de goi** s'ispetaiat su bentu de s'abba, su bentu deretu chi beniat dae sa bucca de Ardaule.

Un'àteru zassu cun medas arzolas fuat in ue como ddue est **su chinau de Bidda de Arzolas**.

## Istulare

S'istula est su chi abbarrat dae su messonzu e beniat pàschia dae sas 'erbeghes.

## Sas misuras

Po ischire cantu baliat unu cunzau non si chisionaiat de metros o ètaros, ma de misuras.

Sa mannesa de unu cunzau fuat ligada a cantu semenedu ddue cheriat po prènnere su cunzau.

Po medire sa cantidad de trigu, si usaiat sa misura de 5 litros a cùcuru; sas famìllias irricas podiant tènnere sa misura de 25 litros.

Duncas unu cunzau chi baliat:

Una carreta: baliat 5 misuras (de 5 litros)

Unu mòju: fuat agualau a 10 misuras

Tres cartos de carra: est cantu a pare a 15 misuras

Una carra: fuat agualau a 20 misuras.

A s'arregorta, su mere depiat pigare unu tantu de trigu a cunforma de su chi fuat s'intirinu(interessu): pagas bortas , ca non cumberiat a su massaju, podiat èssere mesu a pare( metade a su mere e metade a su chi aiat triballau su cunzau), s'in prus tres unu ( una parte a su mere e duas a s 'àteru), bàtero unu ( una parte a su mere e tres a su massaju).

A tres unu cheriat nàrrere ca su mere de su cunzau poniat in casu de bisonzu po su triballu unu zorronaderi ònnia tres. Su semenedu fuat a contu de su triballadore

Invetzes a bàtero unu totu sas zorronadas ddas depiat fàere su massaju e su mere poniat mesches su cunzau netu.

(Iscritu cun s'azudu de tziu Zuanni Antoni Dessi)